

植

物

名

實

圖

攷

植物名實圖考卷之二十四

固始吳其濬著

蒙自陸應穀校刊

毒草

大黃

商陸
二圖

狼毒

狼牙

藜蘆

常山

藺茹

大戟

乳漿草

澤漆

雲實

羊躑躅

搜山虎

附子

天南星

四圖

由跋

半夏

二圖

甘遂

蚤休

鬼臼

射干

白花射干

鳶尾

石龍芮

茵芋

芫花

金腰帶

牛扁


蕘花

蕘著

莽草

鈎吻

滇鈎吻二圖





大黃

大黃本經下品別錄謂之將軍今以產四川者良西南西北諸國皆恃此爲盪滌要藥市販甚廣北地亦多有之春時佩之以辟時疫

雩婁農曰燕薊地苦寒人湊理密而內實冬冽輒吸燒酒圍煖爐與風雪鬥勝春氣萌動亢燥不雨陽伏而不能出陰遁而不能疹於是乎有昏狂鬱塞之病醫者以法解之强者病不損弱者或以亡陽有予以攻滌者內熱下而神明生或起生死於頃刻其處方者不知其所以然凡爲疰爲癘爲鬱爲伏熱爲飲食

之毒爲浮游之火一切以大黃爲秘妙丹藥病者不卽登鬼錄
十失一十失二三四方詡詡然自命爲良其不知醫者亦爭以
時醫奉之卒之技窮術竭刺人而殺人不咎其醫之無本咸以
爲時命之不可假易也故諺曰趁我十年運有病早來醫昔錢
景謚與王安石論新法不合遂相絕有答人書云王安石穿鑿不
經牽合臆說作爲字解謂之時學又以荒唐怪誕非昔是今無
所統紀謂之時文傾險趨利殘民無恥謂之時官驅天下之人
務時學以時文邀時官然則時醫者其時學時官之類乎嗚呼
時乎泰而君子進時乎否而小人興時之爲義大矣哉朝時而

市時也日中而市時也夕時而市亦時也不召自來不麾自去
市盈而盈市虛而虛孰令令之孰禁禁之盈而不盈虛而不虛
知進退存亡而不失其正者其誰乎吾願世之有疾病者忍痛
藏垢以待良醫探囊一試黃昏湯而不汲汲焉捐其軀以聽時
醫生之死之於攻伐之劑而卒不悟其所以然其可謂知時而
不隨時者歟





商陸

商陸本經下品爾雅遠蕩馬尾注廣雅曰馬尾蒟陸或曰易覓陸也今處處有之有紅花白花兩種結實大如豆而扁有棱生紅熟黑江南卑濕易患水腫俚醫多種之以爲療水貼腫要藥其數十年者根圍尺餘長三四尺堅如木習邪術者刻爲人形以驅鬼小說家多載之救荒本草謂之章柳子根苗莖並可蒸食云 按商陸初生莖肥嫩葉攢密秋開花結實粒小宿根莖硬葉稀春花夏實秋時已枯江西上高謂之禾母豆云婦人食之宜子蓋難憑信

雩婁農曰此草非難識者通志乃並菑及蒿藿藟茅而爲一物
菑卽旋花蒿藿藟類藟茅菑華之赤者以意併合乃至雜糅毛
晉以蓬藟之名謂卽詩言采其蓬前人亦無及者蓬爲羊蹄圖
經述之如繪毛謂不甚合何也子夏易傳木根草莖體物盡致
而或者又以千歲穀當之則但見其葉相似耳本經置之下品
其仙人作脯之說可謂杳冥誰則見之救荒本草雖云可食亦
爲本草所拘鄉人皆知其有毒土醫以治水蠱有隨手見效者
其峻利可知方書中久爲禁藥其子老則色黑如豆婦人服之
宜子此與茅菑宜子之說相類南方卑濕俚婦力作水田中其

受濕深矣去濕則脾健故能宜子若以爲祈子靈丹則悖甚古
讚曰其味酸辛其形類人療水貼腫其效如神按夜呼之名殆
假托鬼神之隱
語毛晉據荆楚歲時記三月三日杜鵑初鳴盡夜口赤上天乞
恩至章陸子熟乃止以爲章陸子未熟以前爲杜鵑鳴之候故
稱夜呼亦務爲博奧

水牛子集



狼毒

狼毒本經下品形狀詳宋圖經今俗以紫莖南星根充之抱朴子狼毒合野葛納耳中治聾王羲之有求狼毒帖豈亦取其能治耳聾如天鼠膏耶

零婁農曰本草書於狼毒皆不甚晰方家亦憚用之滇南有土瓜狼毒以其根大如土瓜故名按形與圖經頗肖又有雞腸狼毒性同滇本早亦云猛勇之性真虎狼也兵法曰猛如虎很如羊貪如狼強不可使者皆勿遣不然病弱而劑強是以狼牧羊也又不然則秦虎狼之國也楚懷王入關不返矣將若何